

Ongehoorde verhalen (3)

Op zoek naar de geschiedenis van je eigen leefomgeving

Jansje Rozendaal-Hogebrug

Harpje de koedeern

Harpje is ± 1865 geboren in Koudhoom in een groot gezin. D'r vaoder warkte op de Garderse meul. Daor verdienden ie zes gulden en een roggebrood in de week. t Vul niet mee urn daormee al die moenden te vullen. Daorum zaidie op een goeie - of slechte - dag tegen Harmpje: "Kiend, ik het es um'ekeken naor een diensje veur joe en ik het wat 'evunnen. Jie worren koedeern op een boerderietje in Halvinkhuzen."

En zo is 't 'egaon, dat Harmpj e, acht jaor oud, veur dag en nacht uut warken ging. Ze ging lopes op d'r klompjes, een zak mit wat ondergoed en d'r goeie grei in d'r hand. Wie zou d'r weg'ebrocht hen? D'r vaoder? Mar die had alleen zondags vrie. Een ouwere breur of zus? We weten 't niet. Mar denk je es in, een deerntje van acht jaor al helemaol t huus uut! Je worren d'r naor van.

In Halvinkhuzen mos ze 't wark doen dat elke koedeern of koejong dui. 's Marges nao 't melken mit de koen de weg op um gres veur ze te zeuken. In de barm of op een stuk weust land, ze mos mar zien dat de beesten genug te vreten kregen. En vanzelfs ok genug waoter, dat was vaak nog een heel gezeuk. An 't end van de mirreg mos ze dan weer op huus an mit de beesten, want 't worde melkestied. s Nachts stingen de koen op stal en vanzelfs ok bie wienterdag.

Gelukkig truf Harmpje daor in Halvinkhuzen een boerin die goed veur d'r was. As ze 's aves klaor was mit d'r wark, zei die vrouw: "Je hen zo goed 'ewarkt, kom noe mar is bie mien zitten, dan za'k je leren breien." Harmpje kreeg eens in 't jaor d'r loon uutbetaold. En umdat ze zo flink 'ewarkt had, kreeg ze d'r ok nog een paor klompjes bie. Wat zal ze daor blie op naor Koudhoom 'eleupen hen um d'r geld tuus te brengen.

Laoter is Harmpje zelf boerin 'eworren en het iezig hard 'ewarkt. Ze kreeg

kienders mar het 'r twee van verleuren an de Spaonse griep. Harnpje is heel oud 'eworren. Ze het d'r leven lang veul en greeg 'ebreit. Dit verhaol is mien verteld deur Harnpjes oudste deem, die ik goed 'ekend het.

+++